

09.03 MARELLA

«Datt or bain?»

Cun talas frusas salidavan ils purs da tartuffels in l'auter pli baud en la Rumantschia. Bain savens avant 250 onns, damai che alura – cun la fomina dals onns 1771 enfin 1773 – han ils tartuffels conquistà las maisas en il Grischun. Per arrivar sin ils plats dals Grischuns e da las Grischunas ha il tartuffel dentant stuì surmuntar ina via stentusa. Ina lunga via da lontan, flancada da sceptica, da dolurs e da fomaz. Ed era varsaquantas sfidas linguisticas ha il tartuffel stuì dumagnar. Suenter ch'il tartuffel aveva dentant s'establì sco mangiativa, è el avanzà pli e pli ad in dals aliments centrals en l'entira Europa. Ins pudess dir, in vair drama da tartuffels. Tgi che di ussa anc



ch'il tartuffel saja in legum lungurus ed antiquà, raquinta ina detga buglia! Primo n'è il tartuffel per propi gnanc in legum. Secundo datti vairamain da scuvrir numerus misteris davart ils uschenumnads patatis – uschiglio avessan nus strusch pudì emplenir in'entira «Marella» cun quel tema. E perquai fa la «Marella» ina decleraziun d'amur al tartuffel cun in via-di culinaric ed istoric-cultural en il mund da la bulba mistica. Ella raquinta, pertge ch'il tartuffel è daventà uschè impurtant en l'economia e la sociocultura grischuna, pertge ch'el ha tants nums, pertge ch'el ha già ed ha er oz anc bliers inimis, pertge che cunzunt sorts veglias dal tartuffel han in agen character e pertge ch'il tartuffel porta ina chamischa en tschertas parts da la Rumantschia.

Redacziun: Olivia Spinatsch